

Prix : 0 fr. 25

Au profit des Affamés Russes

Pour la Manifestation du 9 Avril 1922

Modeste Hommage à l'Union Coopérative

Li Tchant des Coopérateurs

AIR : Li Tchant des Wallons

PRUMI COUPLET

On a dèdjâ fait saqwantès tchantreyes
So tos les airs ès sos tos les sujets ;
Ouye, à l'honneur di ciss' belle assembleye,
Dja st'adierci deux, treus novais couplets.
Dji v'vous tchanter eune di nos grandès oûves
Qui l' class' ovrîre fiesteye avou bonheur ;
C'est st'à vos autes, ovrîs, qui m'coûr si drouve,
Po v'dire poqwè (bis) qui j' sos coopérateur. } bis

DEUZINME COUPLET

Nost' Union, qu'a pus d' deux cints botiques
Wisse qui les mimbes sont, turtos, bin chervous,
N'offeure en vinte à ses hopais d'pratiques
Qui des dinreyes d'on bon gosse riknohou.
Sins fâx messédjes, sins truc ès sins tromp'reye,
Bonne qualité ! C'est l'régue qui fait honneur ;
On n'y trouve mâye qui dè l' bonne marchandeye,
Vola poqwè (bis) qui j' sos coopérateur. } bis

TREUZINME COUPLET

Li société, po marquer ses prix d' vinte,
N'a mâye compté so n' fwète majorâtion ;
C'est qu'elle ni deut, à nolu, fer des rintes ;
Po l' capital, nolle rénumération.
Elle ni préveut qui quéquès censes à hipe
Po ses p'tits frais, sins rin mette âd'diseur,
On y vind d'tot âx pus bas prix possipe,
Vola poqwè (bis) qui j' sos coopérateur. } bis

QWATRINME COUPLET

Avou s' bilan, l' société fait ses comptes,
Po z'ètâbli les censes qu'elle a wangnîs ;
A tot còp bon, l' hopai d' bènèfices monte.....
Mins çou qu'elle wangne, elle li r'mette âx ovrîs.
Li commerçant wåde tot, lu, c'est s' malice,
I n' fait nolle pârt po les consommateurs ;
A l'Union, on r'touche ses bènèfices,
Vola poqwè (bis) qui j' sos coopérateur. } bis

CINQUINME COUPLET

Divins nos autes, on maintint l' bonne aweure
Par li pratique dè l' solidarité ;
Naissance, décès, maladeye ou blesseure,
To çoula compte po les indemnités.
C'est totes ces oûves, qui sont st'ine vraie merveye,
Qu'accrèhet l' djoïe, qu'adoucihet l'malheur ;
On r'lîve l'ovrî à totes les pâdges dè l' veye
Vola poqwè (bis) qui j' sos coopérateur. } bis

SIHINME COUPLET

Li société a fait saqwantès oûves,
Totes, po r'lèver nosse bonne populâtion ;
Mins, portant l' cisse divant l'quéle on s' dis'côuve,
C'est l' pus clapante : C'est nosse Caisse di Pensions.
C'est cisse caisse-là qui mette les censes è cresse
Qu'à soixante ans, n' z'estans sûrs dé raveur ;
Ca tos les mimbes ont leu pinsion d'vîlesse,
Vola poqwè (bis) qui j' sos coopérateur. } bis

SEPTINME COUPLET

Ovrîs, mes frés, li d'vwèr, ouïe, nos rassonle
Po nos miner, par li Coopération,
Es l' nouvelle vòye, wisse qui, turtos essonle,
Nos frans pus fwette, èco, nost' Union.
Li Société, qu'est faite po l' classe ovrîre,
Riqwîre por leie, ine veie di pus d'bonheur ;
Rapoûlans-nos, turtos d'zos s' rodje bannîre,
Tot répètant (bis) ; *Vivent les Coopérateurs.* } bis



18 Mars 1922.

UN VIEUX COOPÉRATEUR

Reproduction interdite, sans autorisation de l'Union Coopérative.